

335 et redit effusis per laxa volumina palmis.
 semper erit, paribus bellum quia viribus aequant.
 proxima sors Cycni, quem caelo Iuppiter ipse
 imposuit, formae pretium, qua cepit amantem,
 cum deus in niveum descendit versus olorem
 340 tergaque fidenti subiecit plumea Ladae.
 nunc quoque diductas volitat stellatus in alas.
 hinc imitata nitent cursumque habitumque sagittae
 sidera. tum magni Iovis ales fertur in altum,
 assueto volitans gestet ceu fulmina nisu,
 345 digna Iove et caelo, quod sacris instruit armis.
 tum quoque de ponto surgit Delphinus ad astra,
 oceani caelique decus, per utrumque sacratus.
 quem rapido conatus Equus comprehendere cursu
 festinat pectus fulgenti sidere clarus
 350 et finitur in Andromeda. [quam Perseus armis
 eripit et sociat sibi. cui] succedit iniquo
 divisio spatio, quod terna lampade crispans
 conspicitur, paribus Deltoton nomine sidus
 ex simili dictum, Cepheusque et Cassiepia
 355 in poenas resupina suas iuxtaque relictam
 Andromedan, vastos metuentem Pristis hiatus,
 [expositam ponto deflet scopulisque revinctam]
 ni veterem Perseus caelo quoque servet amorem
 auxilioque iuvet fugiendaque Gorgonis ora
 360 sustineat spoliūque sibi pestemque videnti.
 tum vicina ferens nixō vestigia Tauro
 Heniochus, studio mundumque et nomen adeptus,
 quem primum curru volitantem Iuppiter alto
 quadriiugis conspexit equis caeloque sacravit.